

四庫全書

集部

欽定四庫全書

集部

江湖長翁集卷三十五  
六

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣何銓

欽定四庫全書

江湖長翁集卷三十五

宋 陳造 撰

墓誌行狀

臧子與墓誌銘

臧君子與諱鏗楚之淮陰人臧氏郡大族大父翌以承  
信郎當建炎兵亂被命通判泗州與權守徐宗誠死守  
獨不餌於虜安撫大使劉公光世劾薦例遷終訓武郎  
父珪保義郎嘗主管時貽軍權場二公家世雄於邊敬

賢下士賤人之急鄉里訟訴往往為平之既官則就間  
樂鄉居不切切於仕君其中子也兒時岐嶷異甚授以  
書竹破冰釋遂儒其冠遊場屋如猛將轅陣辟易莫前  
驥子一鳴羣馬瘖伏四取鄉書掇如也論者曰是必大  
臧氏天以報兩翁耶嗚呼不幸死矣君奉親孝事兄鈞  
謹撫弟鏞姪濟之而教之恩意良篤用是弟姪請鄉書  
皆有立與朋友敬而信與人節而不固通而不流世之  
為儒粗能文則猥挑選世君尤薄之與予父子遊最厚

居連墻往來無間侃侃也以師命某而文筆與小子頡頏後先君微疾而死某時客儀真不及視其屬纊久則歸哭於奠筵而已念之慙然銘以紀其實有以慰君之靈而信將來予其責亦所以少殺其愧云君生於乾道乙酉四月八日卒於嘉泰壬戌三月五日享年三十八以某年某月某甲子葬於某所娶元氏子一方七歲女二長適進士胡庠次尚幼其銘曰

有茂其姿而嗇其施怛悼惜悲是將曷推不顯其垂視

我銘辭

呂正將墓誌銘

正將呂君卒越明年其弟思忠思問攜其孤瓌以母氏  
梁夫人命持所為君行狀泣謂高郵陳某先兄不幸其  
與子遊舊矣敢以墓銘請某惟昔歲客行都獲交君知  
之甚悉其見敬愈吾知君不容以不文辭君諱思恭字  
禮夫東平人世業儒曾祖震娶楊氏通經好文元祐間  
徙京師盖有志於學也靖康初南渡家於杭祖安道娶

陳氏父興祖今梁夫人其配也幼失其父偕二弟事梁  
夫人幹蠱外醜應肅給遂推擇而仕積官自承信郎至  
修武郎職初樞密府屬次親王府次監左驥院次樞  
密院正將不及赴受知當路則薇猷閣待制宋公之瑞  
顯謨閣直學士樓公鑰內相高公文虎大著揚公寅尚  
書劉公德秀左史陳公謹右司林公桷薦揚諮委甚至  
始梁夫人娠君外祖母夢神攜偉男子闖門翌日君生  
魁梧豐潤符所夢識者曰是呂氏慶也弱不好弄既長

果亢其宗惟以奉親為樂色難志養無所不用其至仕  
須次不敢遠親夫人未寢不敢退夫人飽食乃甘夫人  
疾藥物口乃進饘粥手以食嘗病君奉事劬頓幾不救  
營為細大與二弟孰議則曰於母故罔或敗事治家嚴  
而不苛紀緒檢押截然也二弟謹守為令族君器度疑  
重性宇粹溫居官廉勤自將與人交務施而不責報人  
以匱告多輟已有袖畀之有所予惟恐其知人或負之  
輒自責曰某時某事似有愧宜得此行孚於人翕無間



然及其卒中外聞見咸痛悼如至親廢隸二百相弔曰  
捐當取之金以惠其下寧復公里閭之財際者相告語  
嘗起母病折券以利我公巨忘城東民尤孺慕也曰甲  
辰之疫吾輩不腐齒吾微知之公實生我凡君刑於家  
媚於官德於人其懿如此然皆自事親之心推之理委  
也必源其徒然歟君好賢而語上愈於己禮之惟恐失  
色辭勉子弟以學常誨之吾不得逞於書惟是慊然其  
令聲懿行乃爾人皆曰是天資嫩是固然然孔子於孝

必歷言所可移者孟子謂治民信友悅親其本也君之賢吾得之源委也非耶女弟二長適元氏已亡甥二女甥一婚且官皆君力封殖之次適趙氏君娶張氏先君二十四年歿後娶江氏元祐省魁行之族也子瓌進士女二人長適承信郎張思義次早世君生於紹興庚午四月二十有六日卒於嘉泰改元四月十日將以某年月日葬於錢塘履泰南鄉積慶山之原祔先塋也二弟念兄之切置不食頃子孤立无所感故為銘曰

望之儼乎其容也即之裕乎其洪也宜於官施於人愛而周節而通也溯之源孝之充也嗇於邦家則豐也燕儀斯惟無窮也

徐氏墓誌銘

明之定海多隱君子其儲德毓操家政可法如劉君宜之最其優者究所以致此實內有彊助其配夫人氏之力為多夫人生於慈溪之徐氏歸於劉君有二子二女其孫三其女孫四其曾孫男女三方其在家女德婦儀

與性而俱不以矯揉暨為劉氏婦承以順迪以義恭以禮遜延士輯睦鄉閭治生不貪予人不靳然不害其優裕用能植立門戶為持家者表式其遇子若孫嚴毅而不失愛誨誘而不云瀆擇賢師儒授以詩書里之可教而無力者館贍之為子孫友逮今庭蘭僉僉儀觀偉甚儒業有聞皆夫人啓其源自幼至老德日以茂譽望隨之鄉人誨其女必曰盍法是第其族姓必曰劉氏有敬姜焉見貪嗇者必嗤之曰不愧徐夫人乎享年七十有

八生以某甲子歿以紹熙壬子十月二日其謝世後劉君幾年而家道益大以治長子某次某未仕長女適某次適某皆先夫人卒某某孫男也業於郡序孫女長適某自餘與曾孫男女皆幼平生孳孳懋德聞人善獎導之恐不遂耳毀訾之言輒不怡素喜佛書屬續之際超然而逝若釋氏所記者夫生為鄉曲師歿以壽遠若邇猶曰胡不百年嗚呼真不愧古圖史賢哉某宰是邑其長子某懷經來客久彌敬一日踵門有請將以來年

春偕先君合葬於香山之原不可無銘非子尚孰宜為  
廼為之銘曰

婦德豐世道隆備厥躬始以終我銘之詔無窮

洪氏孺人墓誌銘

孺人洪氏某郡某縣人家蓋甲族祖若禰皆有隱德嫁  
為同郡今房州司理余君澤之妻始其歸君猶從事場  
屋孺人經理其家務俾得專力於學歷若干年果得祿  
孺人力為多在夫家克勤撫童隸賓祭躬女工寧自約

不私所有接親姻無廢禮撫童隸不失恩知人緩急周  
其乏惟力有謀焉畢其忠或有所規警人素敬之以故  
多樂從淑姿懿行纖悉不遺姑氏寢疾久左右省侍饋  
粥藥餌非手不進凡枕席濯瀚寒燠起居咸孺人焉是  
仰凡三歲無少怠姑屬纊執其手喟曰汝若是吾何憾  
人以為難舅通直君既鰥處性嚴重孺人侍奉順承不  
失色蓋十五年暨其卒有庶女二已子撫之為擇佳室  
以歸伯氏以毀繼俎其室他適其孤二收育其男女雖

偕其母往孺人顧恤撫存皆不殊已生人尤以為不易於其難者饑食渴飲然餘優為之士君子或能之孺人則無愧是足以業家法後佐佑其夫既仕矣推於諸子誨導之諄復備切皆儒其冠駸駸有立其生以某年某月某日年若干為余氏婦享年若干而歿時慶元乙卯三月七日也男四人某女四人長適待補國學生石必簡餘在室孫男四人某方從學孫女四人皆幼將以某年月日協吉葬於里居北原高蓋山之下孺人未既歸



識不識愛敬慕傲之司理君居官所孺人家居以歿用是莫不慊焉為之慟司理君父子哀摧痛悼求銘文於予予與司理君為寮於房其子某又從予遊而甚以學嘗答之以書者故不容辭而為之銘銘曰

婦儀之秀母道之茂女德之所應有曷不百年以衍厥後彼固存者永世不朽

安人曹氏墓誌銘

安人曹氏婺之東陽人祖某父某隱不仕歸於郭氏為

今揚州通判某之妻奉舅姑敬以愛接如姊穆以順施於中外歸重無間言治家儉勤隨事區處不御以嚴而不爽節度家以益振其所以奉烝嘗延賓旅必躬親之豐備辦集皆如其志而其自奉取足而已衣楚楚則歉然耳目玩好若浼焉者至於閭里窮匱調之無靳色安人兄弟早世母繼逝捐私蓄振之其送終之費一切為辦治其赴義甚勇率如此偕通判公宦遊言未嘗及外事閑御童僕嚴且密及倅維揚安人病不克偕語別勉

以廉勤諄諄也生於某甲子卒於嘉泰辛酉七月十七日享年六十有四男子三長昌年次昌時季昌宗皆業儒女子四長適成忠郎王觀國次葉浚次應淙皆進士次承節郎趙汝樞孫六人女孫四人尚幼以通判再遇郊恩受今封將以嘉泰癸亥十二月十八日葬於紹興府上虞縣上雲鄉皂李湖順嶼之原求銘於高郵陳某某通判公之友也宜為銘嗚呼安人在父母側已著淑聞施於夫子婦道以修母道以隆家政紀緒斬斬乎以

媚於其官儀於其鄉胡不百年聞見興嘆然安人學釋氏有得其淑質懿行書之皆可無愧賢哉銘曰

為婦而婦君子譽處為母而母粉燧繼武自家而鄉有挈其矩善始以終了彼旦暮順嶼之原松栢廡亘歲千百來者燕裕

致政朱公墓誌銘

代人

致政朱公既卒之二年其子紱走書吳門謂其里人羅某曰先君襄事有日當有銘捨子誰宜為某不克辭姑

次其行業始末公諱某字某撫之臨川人曾祖某大父某考某皆不仕公幼而悟敏學力超邁志未竟考以家務委之細大區處無遺慮家富而行益修親說之謂吾子克家而孝撫一弟謂吾兄視吾猶子其族人稱其洪毅曰嘗陵之不吾較也其鄰里鄉黨賴其訓惠曰頃邑荒政有緒公則王之至減直發所有穀富室取則價為平建東西塾於家受業者赴之待之與其子均蓋其資質淑茂進善累德得之自然繼以不怠古所謂篤行君

子者歟淳熙丙申甲辰慶壽之恩霈再授修職郎夫人  
陳氏賜冠帔以其子士與鄉薦故有此拜乙巳八月十  
有六日以微疾卒於正寢享年八十有三子男六人紱  
綬綺績士紘女一人適進士侯賓王先公五年卒孫男  
十二人損復之豐之渙之震之謙之漸之允之益之履  
之革之升之損早卒豐之亦嘗與鄉書餘方就學孫女  
十三人長適進士吳廷秀餘未嫁曾孫男二人將以丁  
未某月某日葬於新豐鄉之輿原某與其子士偕遊場

屋故得公為詳嗚呼士抱所有不克時施有淵淳無雨  
施古今所歎然其裕於躬刑於家孚於鄉足以示規檢  
無窮使凡為子弟為家景其風將曰九原可作則亦可  
以自慰銘曰

內之克甚粹而醇嗇厥施積諸其身家而鄉罔底於君  
義以儲利其後人

丁君墓誌銘

士生世以才若德既其窮達則命存焉君子知人且知

天閱古今無怨尤即丁君之初終益信不疑君信之懷  
玉人樂鄂渚土風因家焉儲德植操輩行古特立士其  
事親孝其行身謹其持家和而節其知識閭里推其賢  
服其化頗被其振拯凡士所當有者君優之求所以然  
盖由學問出君幼則嗜詩禮工著述奉親應物之暇書  
不去目從師友四方不憚也如戴公幾先官儀真苗公  
昌言在秣陵率諸弟從之遊其文新奇渾厚落筆數千  
言一舉於鄂與弟之煒聯鑣忌者以土著藉口訟而聞



罷君怡然不沮而志加勵自淳熙甲午三舉於漕闈皆與計偕則以助邊補授而試然皆屈於春官人為君憤喑不平君若不聞益懋於業為古學計其遠大者家有室舊榜延桂盤薄其中焚香盥沐課未見書詩與氣益昌名與業日隆諭子姪以不倦不息諄諄焉蓋其學有裕其德義不餒益知士之行由問學乎出盡善無議也而不得齒一命以卒惜哉夫積諸身者可及諸物行諸家淑諸鄉閭者可施諸君推諸官而事與理違君子天

人之說至此猶置之歟君之卒紹熙二年十一月壬子也享年若干曾祖某祖某父某皆不仕而儒其家收書教子汲汲至君父子而盛四弟某某早世某不任某見官襄陽娶章氏生三男曰某某某克嗣其業長女適進士江某次適成忠郎趙某將以某年月日祔葬於先君之兆以某與君厚且知之審來求銘銘曰

驥也不使馳於千里玉也不使器於璵璠能其人不能其天理則云然其不容沒者世所謂方賢也

太孺人王氏墓誌銘

代人

孺人王氏其先有名宰諱肇者起其家繼是登甲乙科  
蟬聯有人孺人羣從兄弟也占籍撫之崇仁高祖徙宜  
黃家焉曾祖及祖日章父徽之孺人早孤隨母饒氏適  
崇仁之王氏暨笄歸於居士繆公昭字公著孺人在家  
為淑女既嫁為賢婦訓子持家為令母為慶門中外懷  
服閭里師仰豈苟然是有德焉而其資質之純詣識趣  
之高遠足以行之故也始嫁也繼姑李氏嚴甚不假子

婦以辭色孺人獨能得其驩心居士簡淡事不嬰慮孺人區處分畫井井不紊居士既下世則以興起門戶自任治生外延名儒課子孫以書其後薦名禮部相屬也而貨產眎昔亦三倍增其處骨肉之間特厚聚居千指穆如也無間然者娣姒有寡居者幼稚林立夫人撫愛踰己所生家法整整而待下有恩意凡臧獲一人服役則全家仰食環其廬不自炊者蓋數十室性不嗇於財振貧窶恐不力女之不能嫁喪不葬倚夫人而辦自內

之使令外而鄉社不知其幾惠於遠近之人及門無不  
售之物負券無必得之誅平生蒸嘗家廟而已老佛之  
徒禱祠福報之說一不能入至有所丐請則亦不拒施  
予自其天性豈寧惟是舍東樂陂溉田餘二十頃岸善  
頽業田者病之夫人歲任修築有田之家坐享全利不  
與其勞費調恤之博且果於及人如此性剛明人不敢  
犯有觸其怒尋亦置之不念也凡簿書出納一過不忘  
陰陽五行百家之說皆能知其義生於政和之辛卯至

紹熙辛亥以終享年八十有一少疾疹耳聰目明生啖  
寒茹壯者不逮也歲時為壽子孫後前濟濟僦僦人欣  
慕之當淳熙甲辰我壽皇上文母壽以其孫嘗與鄉薦  
封太孺人歲丙午高宗皇帝慶八表加賜冠帔是皆天  
所以為厚德報非耶夫以富壽康寧加以好德與國慶  
澤者再寓世可無憾然歿之日不惟子孫戚屬摧毀攀  
慕而鄉鄰揮涕咸興胡不百年之悲是何從致德之所  
感而人懷慕有不能忘自然也德偉矣疊疊焉曾未始

有其有不幾老氏所謂不德有德者歟男三人漸先夫  
人三十三年卒次渙洪女三人長適某官羅次進士曾  
參喬次修職郎前福州閩清主簿羅衛男孫六人長進  
士驥次謙康仲駿皆鄉貢進士女孫七人長適某官李  
次進士曾匯越七年卒次進士羅默次進士羅餘次國  
學生羅勳餘尚幼曾孫五人女四人夫人得疾即自謂  
不起預言其期既革呼子孫前人為之誨皆可佩服言  
畢逝矣乃其所期日十二月之丙子也夫人有得於中

者超卓如此推之於世有本者固如是哉將以某年某月某甲子葬於所居之水北曾潭之先塋而以銘文見屬某方縻朝紱母氏且老不克歸營襄奉以為大感謂某捨汝復誰宜為銘夫人於外孫惟某為獨厚不以常兒蓄之某今者謬綴班聯不失其身者思所以報期待也恭惟此恩深重巨疇又其得夫人行實之詳莫吾母若然其所述亦槩舉有不容詳盡者銘曰

持之有常無為為之德之盛也望之士君子其猶病也



允矣夫人得之安行取之性也刑之鄉本之家侈其慶也曾潭之原松楸鬱然尚百祀之敬也

安人張氏埋銘

安人高郵新安里張氏女也歸於同郡陳某里不喜士人始嫁莫不以壻儒為嗤點安人獨陰自喜某貧嗜書安人捐所有佐費且幹家政某得以登乙未乙科尉繁昌職吳門教宰明之定海通守房陵安人同食其祿凡二十有四年乃卒始某免白丁安人澹如不改常日問

之曰此自吾命何喜陳氏泰於舊安人猶初度也其臨子弟其處室接物婦人應無者不屑為之於儔輩不一小異其佚樂報享亦倍其類生二男子師文師是皆鄉貢進士孫庠庠皆進士封孺人再封安人以某官及格故其生以紹興壬子十一月十一日其歿以慶元戊午三月十四日歲庚申葬於華村之西原蓋近其父母家云將葬夫陳某廼為之銘於墓之左偏

熊氏墓誌銘

代人

夫人熊氏世為撫之樂安縣天壽鄉人既笄歸崇仁吳君某時吳君已授室慕其名德故樂從之吳君有聲於為儒既壯請舍貢數屈於有司喟曰吾自揆可施於國無路以進施諸家可乎夫人譬解且贊之曰翁才德如此顧不遇命也淑諸子可也佐其營理不遺力家遂以饒吳君卒生幾男其三夫人出也繼而異其居所得產薄甚然不以介懷其後家道日益給足享年七十一而終其生以宣和之癸卯其卒以紹興之某甲子其持家

鄉人敬慕既歿咸取法焉夫人卓有高識思遵吳君志  
篤意教子餘不甚經意每立三子誨以勵業曰汝無以  
立於世孤先人望非吾子也始其別居僅有米一困屬  
親舊擇師果吾恣即予是粟外此吾無有得師嚴甚三  
子小選怒之往往過當夫人喜曰自今吾可無憂用是  
三子為舉子著名而長子某被某年恩廷試名在第四  
夫人不靳於財宗族有不給凡老病若吉凶隨多寡調  
之已之衣食取不饑寒而已性嚴毅不喜飲酒時召諸

婦戒以異姓共處當遵義忍事聞者凜然服行之幼長  
雍肅嘗嗤世人徼福懺過一諉之佛書所行則多愧胡  
為耶其言與行率不悖於道法可不謂賢哉陳氏吳君  
配也生一女適邑人進士繆興時再娶王氏生一男曰  
某一女適樂安進士周鐔夫人所生長曰某次某某今  
迪功郎新吉州萬安尉孫男十人某某曾孫三人孫女  
五人皆幼將以冬十月二十七日歸葬於浮原天寶山  
下走書行都求銘於里人羅某惟夫人資稟高邁守之

彊行之果其篤於教子古敬姜孟母固應如是而起家  
應時無一可議不書之無以勵俗且信後故為之銘銘

曰

炳識以為之原蓄德以培之根以大其門以澤其子孫  
以善其鄉載之公言孰吾取規敬瞻此天寶之原

李公行狀

論士以賢古也後世去取以貴若勢果貴勢乎取則淵  
憲窶人子而李孟師尊至今絀千駟之齊而賢西山餓

夫仲尼其私且矯乎士抱負偉然局不少施以歿其庸  
沒諸吾所以直書李君之行於古或無愧君諱知柔字  
望之家儀真之珠金沙居郡庠為進士工文辭衆推之  
晚年定遷城東隅居面江曰兒從學無便於此弟知剛  
今迪功郎新和州烏江縣主簿花君知彰亦與君同其  
母二弟與君幼同居長同學怡怡切切始末無間言後  
異居推其財於二弟為多君篤孝壯且老念親不衰有  
柴地歲貯所收專為追遠費一簪不他用孝友之行著

矣人以匱乏告視其力調之咸曰是宜掇危科享上壽  
為有德報疾作竟不起壽六十八學克矣不得為一命  
吏聞見者喟惜之既病諭諸子女曹植立未副吾望貧  
無以為學士公患汝幸也田足以自業居足以自庇置  
書牖日吾目不瞑汝不愧名教乎無一語及榮利事結  
纓易簪於以見先哲所學君之識過人遠甚危懼所言  
不失其正賢矣哉曾大父某朝奉郎大父某朝散郎父  
某隱不仕皆塋於儀真之東山母孺人周氏妻楊氏洪



都龍圖公之孫女四子長大亨幹盡為優次大節大鑑  
皆鄉貢進士幼大異出後弟知剛女三娘四子兄也適  
馬堯佐孫男六孫女七君生於紹興甲寅歲之二月五  
日卒以嘉泰元年正月二十七日葬於揚子縣嗚呼才  
則見用有則見知士宜然也亦孰知夫用而知之有不  
盡其燕裕未既也手植三槐者待諸其子李固一代名  
德其先世豈果抱闕隸君之不盡者未勝計而其二子  
取賢書如掇視經史饑舖俛取然其大李氏之門而侈

君之澤倚而需可也予得而併書之

江湖長翁集卷三十五

欽定四庫全書

江湖長翁集卷三十六

宋 陳造 撰

表牋

太上皇帝壽七十加尊號賀皇帝表

聖孝有格慈闈晏享於遐齡皇文煥陳寶冊誕揚於大  
號觀會通而行禮盡愛敬以事親誠罄九重驩均萬寓  
竊惟元聖體道人而之天大君顯親名賓其實天與徒  
故享壽祺而有永實既浮則播德美於無疆載籍以來

其事可考高辛著在位之載曾號榮之靡聞唐帝上應  
乾之名揭親德而祖備肇觀盛際不講靡文蜚英騰茂  
之罔踰亘古窮今之創見恭惟盡舜之養繼周以文方  
璇穹保佑於嚴君必玉檢鋪張於偉績展采錯事三辰  
交驩揚輝奮炎萬世彰信臣叨居外服幸際昌期玉卮  
方舉於漢儀瑤城莫陪於虎拜隘千二百歲授筴於萬  
斯年追五三六經大書不一而足

立春日賀太上皇帝慶七十表

願神間燕揭舜德以繫民介壽永延齊堯年之在位建  
天序肇發生之日宜皇家疏寬大之恩凡在見聞咸均  
鼓舞竊惟仁沾夷夏本乎為天下得人世享治安孰不  
祝聖人使壽况乎躬撫中興之運茂凝退養之休縣寶  
筭神授之祥受聖子日嚴之事從心不踰矩道承宣父  
之傳修身未嘗衰歲過有熊之永在希有濶逢之令典  
見重熙累洽之昌期恭惟道大莫名功成不有廣運而  
奄四海措俗安安難老而彫三光自天保佑將八千春

秋之未艾適五百甲子之甫周嘉與函生同瞻盛禮臣  
適拘守土徒切望雲奉漢殿之觴莫陪百執偕華封之  
祝倍激寸心

賀高宗皇帝慶八十表

雞赦疏恩已講號榮之奉玉卮稱慶旋當震夙之期俯  
偕率土之歡共上後天之禱恭惟道傳列聖統接百王  
謨烈光昭如文武之共處晨昏色養備曾閔之所難格  
天瑞之鼎來喜帝觴之屢舉神筭錫羨介八表之遐齡

電樞屬辰衍萬年之洪算某屬茲守土徒切望雲以天  
下而養親身逢大舜祝聖人而使壽心慕華封

壽皇聖帝加尊號賀皇帝表

肅嚴鳳駕祗造親庭誕揭鴻名推尊聖德凡屬聽聞之  
數孰非鼓舞之深恭惟得道之傳奉親為悅六府三事  
大禹克承帝功五日一朝漢皇蓋有家法謂淵懿之妙  
欲推其盛然形容之際實強而名益隆無上之尊丕衍  
維祺之壽煥聯寶冊前奉珠庭若帝之初歲上儀而嗣

講丕天之慶掩振古以無前臣服采使軺馳神魏闕想  
雲趨之列辟獨阻造廷偕葵向之斯民徒知擊壤

賀壽皇聖帝受尊號表

怡燕閒之神授聖有託受徽懿之號媿天其尊亘今古  
以用光奄華夷而胥慶臣聞聖人所為不可以形容盡  
神心之妙亦難以稱謂求然人主事親之誠敢忘歸美  
而天下被化之久咸極推尊上所不得而辭禮之所謂  
至盛恭惟繼堯而治天德用寧咨禹之功已憂庸釋茂



神聖簡寬之化奄帝王號名之隆古與徒亦天與徒壽  
必得則名必得煥成寶冊祇奉慈廷疊矩重規侈慶源  
而未沫展采錯事揭丕則於無疆臣夢想中宸身糜外  
服覲丕天之盛舉莫預造庭同率土之含生第知擊壤

賀皇太后牋

禮奉未央親顏載說慶叢長樂母道益尊凡屬聽聞率  
同忭躍恭惟輔堯為治授舜承顏歷熙洽之期一嚴閭  
教佐揖遜之舉再定睿謀屬嗣皇極尊親之誠推顯號

為隆古之冠展采錯事三宮均驩騰茂蜚英萬世彰信  
濟慶源於孫子遠暨雲來侈樂事於邦家益駢祉福

賀壽成皇后牋

明主奉親極推尊於聖德皇家衍慶實立本於坤儀揭  
熙號以婉天見盛時之冠古恭惟承堯滋久輔舜無為  
措時三登繼紹興之至治儷聖一意承長樂之驩顏方  
嗣皇孝治之益隆宜慈極德名之兼懿雖天地之大不  
容繪畫然仁聖之妙庶或形容揚輝奮炎擅一時之盛

事燕孫翼子垂萬世之洪休

賀壽皇聖帝尊號表

代石湖

享承顏之養親付萬幾受賓實之名妙參三極中天叢  
慶率土均驩臣聞至人高謝於聲稱妙道豈容於言議  
天地之運固不可繪畫索乾坤之象或亦以健順名况  
聖主奉親欲罄推尊之懿而慈皇體道茲當極治之餘  
仰鴻號之載熙宜上儀之丕歲恭惟繼堯為治旋底三  
登咨禹畀疇式歌九叙凡授受相與一道而孝儉獨冠

百王從姑汾四子之遊衍箕翼萬年之慶退藏於密合  
乎人固合乎天何事於仁得其名亦得其壽茲勤檢玉  
前奉凝旒駢祉福於一家掩風馨於二典臣縻身香火  
矯首雲霄想祕殿之班莫偕率舞追鈞天之夢徒有馳  
神

賀皇帝表

祇款慈闈誕揚鴻號懋帝功之極盛擅美無前即聖德  
以強名推尊敢後邇雖異忤躍惟均恭惟繼統而興

奉親為說九功惟敘克祇禹命之承一道所傳盡得舜  
心之正一遵勤儉庸守盈成謂親恩之大欲極於形容  
而天德之妙固難於摸擬茲嚴檢玉之奉用效運衡之  
窺益隆無上之尊丕顯盡倫之聖增光古昔叢慶朝家  
臣夢隔帝居身縻琳宇覲丕天之盛事莫預造庭同率  
土之含生第知擊壤

賀太后牋

上號名之隆親顏載穆衍邦家之慶母道益尊凡屬見

聞率均抃蹈恭惟儼聖君而立極體坤德以廣生人法  
地地法天克全道妙堯傳舜舜傳禹一本睿謨方嗣皇  
極尊親之誠揭懿號為振古之冠蜚聲騰實顯盛德之  
形容正國自家襲丕天之祉福豈特掩典謨之巨美抑  
將示孫子之宏休

賀壽成皇后牋

明主尊親上儀載歲慈闈叢慶懿號兼崇凡屬見聞均  
茲鼓舞恭惟嬪虞輔治咨禹懋功歷三朝一道之傳佐

萬國重熙之盛坤順乾而載物迄底生成月承日以爲  
明並稱臨照方嗣聖祇勤於孝治宜母慈同舉於號榮  
揚輝奮炎侈一時之盛事詒孫翼子垂萬世之宏休

賀皇太后牋

賓實之名尊親敢後自家而國積慶有源上儀肇舉於  
中宸盛事獨超於振古恭惟睿慈偶聖柔順應乾如月  
婉日以麗天亶資合照暨禹嗣虞而繼統旋底阜民輔  
孝治於明君侈榮號於慈極尊獨推於無上壽益衍於

維祺騰茂蜚英掩百王之景鑠重規疊矩示億載之宏  
休

賀會慶聖節表

夢日開祥撫千齡而接統後天效祝繇四海以傾心凡  
屬生成均知鼓舞恭惟聰明稽古信順尚賢離明善繼  
而皇圖底寧常久用亨而廣宇丕應罄小心而事帝挽  
回太和躬至養以尊親晏享多福惟有大德者得其壽  
蓋無能名而則之天旋屬虹流之辰茂膺川至之慶臣



限拘持節阻遙奉觴竒齡之邁五龍欣逢聖旦率舞之  
同百獸儼近天威

又

里社鳴而啓聖震夙生辰葵心傾而向陽坤維仰德居  
匪遙於禹服祝請效於堯封恭惟稽古有為繼明而治  
資兼仁智動合祖宗孝孚華夷超冠今古武不殺而品  
物自遂刑幾措而一夫靡寃故言天有驗乎人而大德  
必得其壽適華渚流虹之旦馳寰區就日之誠臣雖近

皇居屬兼漕節竒齡邁莊椿之上但頌延洪率舞同舜  
陞之前益勤夢寐

又

龍飛協慶肇臨載夙之辰鼇抃均歡共祝無疆之壽內  
外百辟古今一時恭惟見堯而知紹聖之治離重明而  
善繼乾行健以時乘寅奉兩宮躬曾閔所難之行增光  
列聖掩周漢而下之君無能名而則之天有大德者得  
其壽適屆虹流之旦茂儲川至之休臣屬在驅馳倍多

鼓舞受夫帝祉固知天子之萬年偕此民謳願效封人之三請

又

萬寶告成偶珍符於夢日九州丕應祝遐算於後天凡屬燾持孰非抃躍恭惟聰明齊聖信順尚賢歷數在躬祇承大禹之命天地合德紹隆虞舜之華色養奉兩宮之歡心傳探二聖之妙惟有德得其壽蓋言天驗諸人肇臨震夙之辰咸滙誠忱之禱臣屬拘持節阻筵奉觴

奇齡高邁於五龍欣逢聖旦率舞願同於百獸儼在帝  
庭

又

祥開夢日方良月之就盈誠切望雲率後天而效祝千  
齡協運四海交驩恭惟陶鑄百王粃糠衆甫繼堯而治  
燧乎帝華之重咨禹之功畀以神器之大怡神而友造  
物釋負而置萬機蓋治身以道之真宜大德則壽必得  
華旦適逢於繞電遐齡茂介於增川臣秉節畿封馳誠

魏闕偕千秋金鑑之獻猶阻造庭紀萬歲崧嶽之呼或  
能泚筆

又

推里社之鳴辰載逢於震夙效華封之請祝咸暨於坤  
維凡屬燾持孰非鼓舞恭惟聰明齊聖信順尚賢勲業  
五三六經之傳太和二十八載之久堯父禹子古謂無  
憂帝興王成躬示其法釋負置萬機之重褰裳從四子  
之遊盖身佚樂則年彌延而仁滲漉者帝所佑信大德

得其壽宜言天驗諸人適當電繞之期自行蒿呼之奠  
臣庇身祠宇矯首帝居奉萬歲之玉觴莫窺盛禮上千  
秋之金鑑敢後羣工

又

渚流虹而啓聖良月就盈葵傾日以頌君後天難老一  
人有慶萬壽維祺恭惟協帝重華如周過歷躬神武而  
不殺掩帝王極盛之功得歡心而寧神盡曾閔難能之  
孝格天心之眷佑宜睿算以延洪適甲觀吉祥之辰誠

均夷夏罄華封使壽之請固等岡陵臣夢阻帝居身縻  
使節億齡滋永企瞻南極之星三舍匪遙尚遠長安之

日

賀明堂禮成表

因時謹禮告成萬寶之秋配帝禋先誌祝九筵之室純  
誠昭格熙事備成恭惟統輯羣元叅稽列聖園丘薦灌  
殫精意以屢親重屋揭虔備縟儀而間舉復罄一純之  
報恪遵三歲之規敢以宅憂而怠於靈承逮其竣事則

受茲景貺星宿澗潤協氣泛浮乾坤清寧皇心娛豫翕  
羣靈而頽祉繇奕世以垂休臣持節畿封注心魏闕望  
侍祠之冠佩莫近清光偕擊壤之黔黎賡歌盛事

賀正旦表

千載題期膺璇穹之眷命三朝受籍罄海宇以來王載  
維歲序之更端茂擁日新之純嘏凡居率土舉切望雲  
伏以參四大於域中地法天而天法道著五始於聖作  
正次王而王次春欽歷象以履端本中和而鼓衆庶方



不應百福惟新恭惟發政施仁承天從事慶綿慈極新  
唐堯在位之年祥著珍圖衍漢帝聞嵩之歲適迓舒長  
之旦同躋仁壽之氓臣偶此令辰叨居外服奉玉觴而  
上壽徒傾就日之心攷瑤厯以卜年願效後天之祝

賀改元表

函三體極繼聖治以匹休謂一為元端宸心而謹始凡  
居率土同切望雲恭惟乾健自強離明麗正龍樓問寢  
不違五日之朝瑤厯告祥申衍億年之慶惟視大始而

正本宜和萬民而面王於昭繼志之勤用祀奉元之號  
揭茲正朔同彼車書臣忝與使華竊窺帝意謹持盈之  
治盪耳目以一新大接統之稱暨華夷而四被

謝賜曆日表

御四時之氣肇自履端頒一札之書庸昭敦本布此劬  
農之政首諸持節之臣俯與民編仰孚德意恭惟寅恭  
事帝惻隱臨民管天地之覆持嘉生成遂握陰陽之遞  
代元化曲成自璿璣玉衡之齊底攝提孟陬之正將嗣

迎於豐歲爰申錫於成書舉是舍生孰非拜賜臣敢不  
驅馳原隰勸課農桑雖帝力之何知各安耕鑿俾田功  
之克謹仰副生成

又

課清臺之歷庸謹夏時頒太史之書旁周禹服凡玉春  
之所被仰帝意以交孚恭惟彌綸兩間甄治萬有神策  
錫羨介親壽以永延緯星儷明格天心之純佑上稽乾  
運欽授人時正躔離弦望之經節析因夷隩之事莫重

履端之命俯咨共理之良臣敢不存問閭閻服勞阡陌  
政捐苛細庶息斯民愁歎之聲職布中和冀迎嗣歲豐  
登之慶

又

襲堯之爵仰聖主之無為行夏之時劬農功而有叙一  
扎謹人時之授萬方向帝力之知恭惟歷數在躬天人  
助順陰陽寒暑璿璣玉衡之以齊震兌坎離攝提孟陬  
之既正躋斯民於盛富納品彙於中和臣敢不祇奉成

書恪勤所職務農重穀少裨大君育物之仁薄征緩刑  
庶迎嗣歲至和之氣

又

欽崇天道敬授人時課巧厯於清臺具嚴聖作分成書  
於方國庸劭農功肆令繡斧之臣仰識璿璣之政恭惟  
至誠贊化溥愛法天高拱帝功之成深惟民事之重五  
辰坐撫厯數知在於舜躬一扎下馳正朔宜頒於漢殿  
雖聖意亮陰之際體璇穹生育之心臣敢不仰奉至仁

率先羣吏政尚慈惠用安折因夷隩之民瑞迎豐登庶  
捐歎息愁恨之苦

又

奉一元而司契肅正夏時協五紀以成書均頒禹服凡  
分民寄仰識聖心恭惟挺德睿聰承天寅畏心勤民事  
謹夷折於秋春緒正皇猷嚴勸懲於舒慘究幅員豐富  
之效繫把握陰陽之功宜一札之所臨率九農之胥勸  
臣敢不體茲優渥奉以恪恭代庖而布郡條雖無補報

載耜而宣上意庶竭罷駕

謝太上皇帝清安降赦表

親顏悅豫慶珍膳之復初帝澤尤鴻覃幅員而無外望  
堯雲於咫尺拜漢札之丁寧恭惟約已奉親重華繼聖  
勤顧復之念曾跬步之不忘調寒暖之宜在承顏而惟  
謹小乖宣節旋就寧康喜慈極復遂於含飴宜皇恩誕  
敷而宥罪伏況太上皇帝陛下德侔高厚仁冒華夷有  
增二典之光丕享萬年之福方一人祇勤於色養惟疾

之憂者兩儀敷佑於皇躬何恙不已尋正周王之履從  
封楚府之錢無間邇遐均知鼓舞臣外持使節大識王  
言俯與編民效華封三祝之請更資汗簡紀嵩嶽萬歲  
之呼

謝明堂赦表

九筵宗祀熙事迄成一札細書湛恩溥暨邇遐雖異鼓  
舞惟均竊以合宮班常實統和之所明主教孝昭事帝  
之誠雖天子必有尊惟聖人為能饗間郊而祀得禮之



中均暨有生咸蒙大賚恭惟受天眷命酌古御時參華  
祖宗探妙經籍恪勤一意謹三歲之揭虔並侑兩儀聯  
百神而膾食緝熙而懷多福歛用以錫庶民粵茲食土  
之毛舉被漏泉之澤三靈敷佑萬世無疆臣使事所縻  
帝居徒近執豆籩而奔走莫厠羣工之聯沐雨露之沾  
濡俯同一物之數

進布表

如天之覆外暨堯封厥篚之共庸羞楚產前件物出從

荒陋製則單練瘠土所宜謝女紅之纂組彝章有在漑  
臣職之勤劬

聖節進貢表

祝聖主後天之美俯罄輿情舉海隅食土之毛無非帝  
力思效蒿呼之喜敢忘庭實之陳前件物珍毓山川貢  
修淮海多儀及物見四方來賀之心申命用休衍萬歲  
無疆之慶

高宗皇帝升遐慰皇帝表

為天子父永作範於帝臨與造物遊忽乘雲而僊去普  
天之下跼地靡遑恭惟道貫兩儀恩覃萬宇奄違鳳闕  
之奉空切龍胡之悲恭惟妙得心傳愛隆膝下遽隔承  
寧之養可勝哀毀之情仰冀睿衷俯遵禮節少思順變  
領臣鄰寬譬之言惟用解憂慰聖母摧傷之意

慰皇太后牋

稜纏慈極哀結中闈凡屬生成孰非推慕大行皇帝陛  
下業光列聖仁浸中區萬歲為期養歛捐於興慶百身

何贖攀徒切於鼎湖恭惟協贊帝功翊扶皇運方聖嗣  
抱永違之痛宜母慈寬臨感之悲少慰臣民用安宗社

慰皇太子牋

享天下之養方迓寧康悼仙遊之遙偶茲變故遐邇雖  
間糜殞可勝大行太上皇帝陛下執古御今以堯授舜  
祉福施於孫子勲業光於祖宗奄違鶴禁之朝惟極龍  
胡之慕恭惟任隆主鬯誠切奉親方聖主哀摧滋甚天  
傾之感宜睿情寬譬益勤日致之思豈徒順變以節斯

是曰寧神之大者

慰皇后牋

慈極永違悼天傾而地坼含生結戀紛雨泣以雲悲閭  
政所享睿情深篤大行太上皇帝至誠贊化懿範宜家  
三紀題期修身可以治國九齡朕夢厭世去而上仙摧  
慕之深邇遐無間恭惟協成兩宮之教祇贊五日之朝  
奄隔承寧益深哀毀仰冀奉先而思孝少答民情無如  
順變以節哀用寬帝念

祔廟慰皇帝表

禮終襄事孝重寧神廟室有嚴僊游來燕凡在生成之數可勝號慕之情恭惟親受堯傳益深舜慕助因山之禮川嶽効符真在天之靈美塙注目事高振古誠格寰區冀寬天性之悲推用慰坤慈之眷屬

慰皇太后牋

定不祧之禮參對三靈申罔極之恩儀刑萬葉凡居覆疇同極悲推恭惟僊德皇居協成聖治悼僊遊之忽遠

瞻廟貌之儼存送終有加率禮不越伏願抑攀號之至  
性計詒燕之永圖上寬聖心俯慰天下

慰皇后牋

陵園愍固廟室崇成孝孰大於寧神禮用嚴於追遠恭  
惟密佐龍樓之養忽抱鼎湖之悲協贊聖心掃易月之  
舊制參稽祖武燕在天之威靈千祀流芳二儀薦祉伏  
冀承寧天故寬譬皇躬仰用慰於坤慈俯亦安於海宇

祔廟慰皇帝表

襄事迄成寧神惟重爰考不祧之禮用昭罔缺之謨攀  
戀之深邇遐所共恭惟繼堯守位如舜慕親奉弓劍於  
橋山悲纏穹壤儼衣冠於新廟日對美牆垂顯懿於無  
窮嚴繼承之有永冀思付託少節哀推式遵遺誥之言  
仰慰東朝之眷

小祥慰皇帝表

慈極上賓痛無甚者天時已駛祥則廓然想淵抱之  
纏悲暨海隅而揮涕恭惟繼堯守位如舜慕親自驚興



慶之違緬想鼎湖之隔思萬物莫為之報備竭孝誠謂  
三年乃免於懷力行古制事光今昔哀動華夷當春秋  
災涼之已周宜霜露悽愴之增感願思託付少抑悲摧

小祥慰皇太后牋

慈闈棄養天運如流望隔鼎湖悲纏長樂恭惟早偕多  
難同建中興方期萬年耆艾之祥遽有一旦幽明之隔  
藏稽山之弓劍徒想僊游閱漢歷之春秋已周星歲霜  
露之感君臣所同尊矧極於母臨哀有聞於天至願寬

聖念少慰輿情

小祥慰皇后牋

聖主謹終力行古制天時遄運俄閱歲周誠感寰區悲纏中禁恭惟肇偶龍飛之運久承鳳闕之顏斯萬年參與慶之朝遽一旦有鼎湖之痛屬茲祥制深切睿情冀有以寬聖主之哀思所以慰天下之望

小祥慰皇帝表

聖君慕親豈哀推之庸釋玉歷紀叙適寒燠之已周普

天之涯躋地莫處恭惟羹墻在念衰經以居貫兩儀而  
與通行百代之既絕盡謹終追遠之義聖者能之推節  
哀順變之規期已遠矣願思託付之重少寬悲毀之懷

小祥慰皇太后牋

僊游寢遠星歲忽周痛結束朝悲纏率土恭惟作配上  
聖收功中興含飴九重當聖子躬問安之養乘雲一旦  
屬慈皇有厭世之心茲歷春秋之更宜深霜露之感冀  
寬推慕以迪壽康

小祥慰皇后牋

頃自慈皇宵然厭代蠢茲率土推若無生甫臨祥制之  
期益切坤儀之痛恭惟輔成聖治偕罄孝思躬服衰簞  
行古者三年之制感深霜露厯星躔二氣之同可無寬  
譬於皇情庶以慰安於聖母

小祥慰皇帝表

仰慈極之僊游邈焉寢遠稽攝提之歲叙條爾既周哀  
切中宸感深率土恭惟慕親之篤亘古莫儔受精微之

傳揭為聖治念鞠育之厚備極孝思心注羹墻體安苦  
塊德通天地誠動華夷方祥制之甫臨計皇情之彌切  
願寬聖性遵節哀順變之文庶奉母慈盡謹終追遠之  
義

小祥慰皇太后牋

海宇天傾慈皇仙去期云已久哀則有餘恭惟蚤擅媯  
皇之功光輔文考之治謂縣億齡之壽同享五日之朝  
祲遽結於橋山感益深於興慶甫茲祥制倍切皇情冀

抑哀摧仰以遵遺誥之訓用精調御庶少寬嗣聖之心

小祥慰皇后牋

聖主慕親之切亘古窮今海宇感化之深跼天躋地矧  
惟坤德深極睿情恭惟順事慈皇周旋聖孝屬茲一旦  
仙馭為帝鄉之遊胡不萬年禕衣陪鳳闕之養期雖已  
久哀則未忘願抑至情式遵中制

高宗大祥起居皇帝表

代石湖

酌祖有臨尚茲過密奉親為悅可後燕怡再更祥制之

期倍極皇情之感恭惟受舜之託見堯而知法度用彰  
彌切羹墻之念歲時亟易自興霜露之懷然禮本稱情  
孝當養志願儲祉福仰寬三宮追慕之情用億神人俯  
慰四海勤劬之望

高宗大祥起居皇后牋

服堯結戀彌惻皇心承舜解憂率資陰教禮無違者祥  
則擴然恭惟儷聖膺圖自家刑國共底天民之阜孰  
非祖武之繩弓劍已藏攀龍胡而寢遠羹墻如在悵駒

隙之莫留，脩臨再期。冀龍襲多祉，庶禔養志之孝。以燕在天之靈。

高宗大祥起居皇太后牋

太上神遊彌切羹牆之念，慈闈淵抱每興霜露之懷。奄屆祥除，益深推慕。恭惟補天立極，媿聖膺圖。輔三紀之垂裳，靖四方而按堵。仰橋山之結戀，望斷龍胡。悼義馭之迅遷，感深駒隙。情則痛甚，時方廓然。願抑悲摧，調珍膳玉食之御。益迎壽祉，慰聖子神孫之心。



高宗大祥起居壽皇聖帝表

堯喪躬服舜慕日深悼天運之已逝倏祥除之甫暨緬  
惟注想尤極增悲恭惟聰明憲天仁智冠古起積弊之  
俗處縗釐者三年盡大孝於親立標準於萬世竊思痛  
甚之念未慙廓然之時願寬攀推益厚宣節仰順慈  
幄含飴之適俯安聖君問寢之心

高宗大祥起居壽成皇后牋

服堯之喪莫攀仙馭輔舜之孝允屬坤儀倏祥制之甫

臨計哀悰之彌切恭惟克躬婦道合德聖心方慈皇奉  
親茂揚彤管之教適太上厭世悵然白雲之乘輔行三  
載之麓縷共示百王之檢柙劇神遊遠矣之痛適淵抱  
廓然之時冀抑悲摧慰聖心之養志益思寬譬奉長  
樂以含飴

高宗大祥慰皇帝表

四海纏悲服堯喪而甫既九重養志體舜慕以未忘逮  
此祥除可勝淵抱恭惟配天與合繩祖有臨孝理冠於

百王道原得於三聖治而繼治坐臻法度之彰嘏有為  
嘏益注羹墻之念方慈極畢線簏之制宜聖君進寬譬  
之言閱駒隙之光感暑寒於天運問龍樓之寢叢福慶  
於皇家

慰皇后牋

燕高廟之神百靈薦敬畢堯喪之服三殿纏悲情則  
廓然禮無違者恭惟道尊儷極教始自家端有如之儀  
刑輔成聖孝想橋山之弓劍易閱天時倏屆祥除益深

感慕冀迎祉福上解兩宮之顏永億神人俯偕四海之望

正旦慰皇帝表

親養奄違方宸衷之在疚天行已駛倏歲叙之更端舉海宇以悲纏識君心之痛甚恭惟尊惟歸父契堯舜之相傳孝則動天雖曾閔而有愧五表始還於素幄三年躬服於麤衰簡策所無華夷胥感屬屆元正之日遐追五日之朝想惟至孝本於寧神而節哀所以順變俯安

率土之望仰慰在天之靈

慰皇帝正旦表

龍髯莫攀凜聖情之在疚駒隙已駛倏歲律之載新凡屬憐持可勝跼蹐恭惟色養之謹超冠古今孝思之誠感格天地念萬物莫親恩之報而三年茹服舍之哀緬聞異域之傾心咸仰中天而稽首况暑寒之遞易凡燧火之幾更冀奉東朝之顏用承眷注勉遵先帝之訓少

節悲摧

起居皇太后牋

更三聖之傳離明善繼極兩宮之奉坤德彌尊格宗社  
以儲休自閨門而叢慶恭惟德兼任姒教被家邦立極  
中興之初含飴累洽之旦助揚神化人法地而法天宥  
啓帝衷道傳舜而傳禹而况蘿圖增固冀英告祥塵外  
風光晏襲三靈之社壺中日月長稱萬壽之觴

卒哭慰皇帝表

稷纏慈極致養莫追痛結宸衷歷時斯久普天內外望

日悲推恭惟全大孝以奉親盡誠心而繼志茂隆聖德  
有增上古之光申介親齡宜行萬年之福瞻興慶以如  
在悼鼎湖之莫攀亮陰方仰於不言成事俄聞於易祭  
伏願少裁戀慕之痛注念繼承之艱恪遵遺誥之言益  
思順變欽奉東朝之養庶用解憂

發引慰皇帝表

親闡棄養天運如流柳馭戒期倏驚緬邈楓宸永慕尤  
極悲摧恭惟心合帝王孝踰曾閔掃易月之陋念親德

之難酬告因山之成悼僊游之益遠睿斷夙超於今古  
哀誠丕感於華夷伏望少抑至情俯循中道式慰東朝  
之眷是誠先帝之心

冬節慰皇帝表

養違親極莫追五日之朝候變天行倏屆一陽之復眷  
流光之已駛仰淵抱以奚堪恭惟襲爵紹堯奉親如舜  
養志為大收帝王力行之功承顏不違盡曾閔難能之  
孝謂萬年勤鳳闕之事迺一旦抱龍胡之悲邇遐無間



借痛天傾代謝不停甫臨日至想宸衷不已之慕結親  
德罔極之思共願仰慰母慈俯矜民欲任大守重謀惟  
宗社之休順變節哀少寬霜露之感

又


親闈不待悼祀國之天傾歲運已行書魯臺之日至悲  
纏淵抱痛極民區恭惟如舜紹堯傳心是道窮今亘古  
盡孝於家方勤興慶之朝遽紹鼎湖之祿報德罔極緬  
帝鄉白雲之遊流光不居甫陽氣黃宮之復共願納近

臣之寬譬解慈極之悲摧力務寧神是為順變

代趙提刑遺表

雨露疏恩許還官政陰陽為寇莫究天年尚延屬纊之  
期少布戀軒之悃伏念臣受材么麼逢世休明策足仕  
塗素佩教忠之訓致身朝列昔蒙越次之知繼三把於  
州麾仍屢持於使節罷駑自力期上最於中天試用罔  
功偶逃刑於司敗氣衰得疾福過擬災思假息於清閑  
用祈哀於洪造俞音賜可指里社以未前大數有終寧

膏肓之容療將殞生於泉夜終結戀於聖時忍一死於  
須臾思片言之補報仰祈聽察俯鑒哀誠伏願力行帝  
王遴擇文武集和戎之福普暨華夷收偃伯之功用光  
今昔大孝念無窮之計慕親寬弗及之悲綏御至和演  
椿齡於西極寅羞備奉供綵戲於東朝儻天地之恩猶  
或聽之則螻蟻之願於斯畢矣



江湖長翁集卷三十六

欽定四庫全書

集部

江湖長翁集卷三十七

詳校官庶吉士臣  
吳烜

主事臣  
呂雲棟覆勘

覆校官博士臣  
劉光第

校對官典簿臣  
劉景岳

謄錄監生臣  
何銓

欽定四庫全書

江湖長翁集卷三十七

宋 陳造 撰

啓

答胡同年啓

宸廷唱第竊幸聯名仙里效官庶將賴庇雖服勤於半  
載猶相望於兩州蝶夢空勞未遂朋簪之盍鵲音送喜  
遽承札翰之投玩文彩之燦然荷推褒之過甚不敏之  
責有覲其顏某官蓄德宏剛秉心純懿粹學根於性而

副以淵源之師友軼才畀於天而發為黼黻之文章高  
視儒先擅斗南之譽望增光我輩推天下之中庸白璧  
當價必也連城紫鸞過都迅於歷塊揮談間之珠玉已  
俛取於巍科展胷次之經綸宜優躋於膺仕夫何簿書  
勾稽之事可淹廊廟獻替之才蓋聖代取賢用望亦兼  
於用資而君子事上在朝或先於在外佇被日邊之詔  
檢歸聯雲際之仙曹尚其拔茅及此斷木某淮鄉冷族  
儒館孤生書傳囁嚅姑息肩於耕牧光陰蹭蹬敢妄意

於事功殿名偶廁於羣英得飽遂霑於寸祿困而學又其次也尚餘任重致遠之心率以驥不亦可乎此實事賢友仁之志孤陋坐糜於日月光儀徒避於參辰捧雲翰以細披覺茅心之驟豁慰人甚矣渴德尚然承聞俶官期之裝不無叙鄉里之別便郵屬我予以展此生金蘭之情下澤過君或可為數日文字之飲惟是禮容之簡後更希德量之含洪

答從遊三公啓



頭顱引鏡自歎衰遲朋舊蓋簪過蒙咨逮容投名於書  
社仍拜賜於雲章陳義甚高揆才非稱三賢者性資穎  
悟術業粹醇鄉閭傑出之英庠序後來之秀見所未見  
吞萬卷而有餘能問不能視寸長而必取辱當此禮有  
泚其顏使自任為師是犯俗間之所忌若羣居講學茲  
誠儒者之當然諸公姑此為功名之階此老亦與有文  
字之樂

寄柴教授啓

楓陞臚傳竊有聯名之喜芹宮教事偶叨交印之榮在  
齊年事契之最深乃今日從游之云始况心期之不淺  
知天幸之居多差肩同采藻之儒屈指計及瓜之日某  
官器凝塵表價擅斗南粹然冰玉之天資副以淵源之  
家學胷中河漢蟠五千卷而有餘筆底煙雲眇二百年  
而無此家誦太冲之賦人知白傳之名小淹簿領之司  
旋試師儒之職惟此邦蕞爾之甚陋而名士向來之獨  
多自旄頭彗紫微而俎豆不修則學舍鞠園蔬而衣冠

幾盡有識增歎後生疇依迨二聖創述四紀之餘宜多  
士教養一新其舊所惜文風之愧古政須師席之得人  
元侯高耿賈之才猶俯為於文學退之收籍湜之輩豈  
止業於辭章為學者司南其塗待先生日東其首某詩  
書冷族場屋腐儒苦節半生妄作功名之計晚塗一第  
僅償燈火之勞官同元結之漫為祿悼曾參之弗洎頭  
顱若是豈足為縉紳之重輕門戶謂何未免計衣鉢之  
傳授陶家男徒黎粟之索景升兒貽豚犬之嗤端由一

暴而十寒所以寸進而尺退論資刻日謂不待拜於紫  
芝遣子執經乃猶及親於絳帳想維賢者兼容之量重  
以契家相與之情必賜提撕曲加鑄琢儻賸殘膏馥豹  
一斑之許窺則振拔汗塗驥千里而可附公來後矣予  
日望之小俟仲秋治牒而南尚得半歲聚首於此與此  
老為東道之主滿慰交情俾諸雛祝南豐之香長稱法

嗣

復王尉啓

代庖無取暫尸采藻之宮仰斗為勞久計及瓜之間占  
鵲音之破夢喜魚素之到門眼為之明驚朶雲之舊綯  
世所共棄辱華袞之褒嘉輒攄至陋之辭少答不貲之  
惠某官性資敏邛人品高華破萬卷書孰測筆端之神  
物流三峽水莫窮胷次之詞源宜特維揚之雋人是蓋  
天下之奇士夫何從仕猶在中年蓋難售則其價可知  
而晚成者為器必大花封暫駐少須下瀟鵠於前灘芝  
檢飛來行即造鷓鸞於中禁盡紆遠業用福斯民某筆

硯寒生粉榆後進操觚試藝周旋嘗覘於風儀捧檄效  
官鄉邈但勤於夢寐偶郡庠虛席之次應賢守設醴之  
招幸何如之喜有過此即今盥手披鴈足之赤書繼此  
班荆叙門間之半面尚容老退時並英游下里門而敬  
鄉人深所望者寫我心而見君子不亦說乎

答喬秀才啓

高盖迂臨已慰傾詹之素長牋見屬復增衰朽之光爛  
然綵綵之文申以師資之請揆才非稱撫已為慙某人

淮左勝流斗南奇士元祐名德今見遺風臨川故家非  
謂喬木才跨鴈行之表人期虎榜之登夫何建功立名  
之秋猶復含酸茹苦之訴士當尚志人定勝天惟精於  
勤成於思持誠不苟雖困於心衡於慮傾否有期獨惜  
禮意之甚隆不知老衰之無取遽欲北面而受業豈所  
敢當譬如南旆而之燕未見其可若曰多暇來而羣居  
愛子以誠寧復有絲毫之隱起予之益當得諸磨切之

間

交代啓

芹泮効官忝與士鄉之教瓜期間戍獲承君子之規平  
時馳仰斗之心指日快披雲之願望川塗而繫夢憑竿  
牘以貢誠某官名世真才幹邦碩德全閩多士雋游咸  
出於後塵當代數人我輩不勞於俯視人誦凌雲之賦  
宵蟠插架之書如金華老仙揭示江西之句法雖東京  
名士孰如叔度之量陂尚遲三字之聯榮俯為諸儒而  
小駐進賢輔世已聞鸚牘之馳華國須人行拜鸞坡之



命盡紓遠業用福斯民如某學舍陳人淮鄉冷族半生  
苦志艱難險阻之備嘗一第代耕勃窣嫠珊而不進念  
吳門士氣之大振乃今日浙郡之所推擇地而求輕六  
年之遠次攜雛以往冀羣彥之與遊想多聞直諒不無  
若人况老成典刑併遺成法撫初心而竊抃臨晚節以  
增輝坐廣文之壇等作諸侯之客告令尹之政佇觀賢  
者之風

答吉解元啓

得祿士鄉不廢詩書之樂依風雋軌正資道義之交未  
修執鴈之恭首拜朶雲之賜某人天資粹穎術業深醇  
青銅懷萬選之錢綠耳躡中塗之足成風妙斲贖傳絕  
俗之文造物小兒寧復憐才之意小耐詩人之吃蹇率  
多痿者之起行平心以須何恙不已如末章之示諭荷  
厚意之眷存不鄙廣文之無羶擬作監河之貸粟諾敢  
輕於季路飽恐誤於陶翁蓋欠餘未及於究知則取予  
固難於縣定儻其優裕敢後周旋

答曹秀才啓

佳客踵門喜清譚之滿聽新篇落手覺病眼之增明高  
山躑景仰之懷明月重暗投之悔某人際天卓識倒海  
宏才雖崎嶇白眼之前終軒豁紅塵之表貴洛中之紙  
爭傳刻鳳之章摘領底之髭行有化龍之便至於長城  
五字金薤千篇作者未見輩流詩人乃其餘事較之今  
昔平處猶可奴隸騷捐其緒餘惠然亦復膏馥我試効  
捧心之態少希過目之榮顧此平凡尚其鑄誨

答平江職事啓

老去作諸侯之客少慰塗窮竭來從賢者之游庸非天  
幸喜披霧之伊邇忽朶雲之墮前文辭爛然推予過甚  
其人東南之秀雋偉不羣意其已上於霄霏夫何猶滯  
於場屋天文可考尚魁宿之躔吳人望攸歸佇漢庭之  
策董某之疎謬意實傾輸論情道義之交言從此日屬  
饜文字之樂更判留年

迎提刑趙殿撰啓

奉詔檢於中宸庀臬司於近甸慈祥之譽久已簡於帝  
心察舉之權茲用煩於國老望輶車於一水傾喜氣於  
八州先聲所臨有識相慶恭惟某官才宏而量偉識周  
而氣充學必探原人仰河間之大雅言惟憂國上知子  
政之多聞中外踐吏聲華藹著省蘭卿月能稱屢徹於  
九重使節郡符課最特優於諸彥竹有迎刃日無金牛  
恢磊特達今劉亭山精明不苛古于定國自廣陵委靡  
之歷載得賢帥指麾而一新黠吏履冰無復簿書之緣

絕流錢在目未妨閭里之詠歌信大手之所為非常才  
之跂及惟全吳號浩穰之極在今日為囂訟之雄帝眷  
承流之宗英命宣止辟之睿化激揚清濁肯專柱後之  
文獻納論思行副朝端之寄盡摠遠業用福斯民某受  
塵淮鄉苟祿聖世尚載籍之友未云滿其志趣事大夫  
之賢庶以博其見聞心則拳然人誰領此頃懷漫刺獲  
窺彥輔之天今坐冷官復邇晉卿之日此意所甚切者  
一旦不啻疇之蓋將靜觀設施追吏師之規模抑以進

聆馨欵求時平之典故窮塗至願老境幸逢凜繡斧之  
生風即有趨承之便上星辰而聽履得無攀附之緣

答潘解元啓

潘石湖甥

滿聽粲花之論徐披振綺之文種種擅長無忌固知似  
舅諄諄見屬柳子豈堪為師雅意莫酬厚顏可諱某人  
儒林挺秀學海窮源犀一角以標竒龜五摠而擅富外  
家書傳向來親得於傳衣平世功名政恐不容於袖手  
况石湖老仙之重望迺香山居士之後身語默繫夷夏

之觀瞻效唾為天人之珍祕子是之學歸有餘師豈期  
謙虛俯逮衰朽所况愈下過採南箕北斗之名用心雖  
勞寧免野鶩家鷄之謂予所望者君其圖之儻略去師  
弟子之稱得研窮古聖人之趣共儒宮之長日策經笥  
之竒勲豈敢終辭有足為樂若曰為處士而下榻未後  
衆人脫或問先生而振衣其避三舍

答沈學諭啓

寂寞之濱來游已幸清新之作見屬為榮誦之俄至於



再三佳處僅知其萬一推褒過矣環省缺如某人襮積  
詩囊深沉經笥固已略月露風雲之態豈止深喉襟管  
轄之書踐履邱軻所謂聞而知者陵跨鮑謝固將俯而  
視之正自家傳得諸心悟玉屑棄而猶寶驥子墮而追  
風向窺短詠之春容復讀長牋之典雅冷官增重遽延  
重席之儒老眼為明快覩奪袍之手顧如衰朽忽辱題  
評文不逮人學終愧古念知者去仁者遠即我夫復何  
求若今與居古與稽於兄豈其得計而諄復之辭真若

有得景仰之素已不啻疇繼今講肄之餘綽有遊從之  
樂佇觀多士羣經收是正之功抑俾老夫一字得敲推  
之證久稽作答尤劇懷慙

答嚴上舍啓

希代至珍時許拜故人賜冷官樂事顧敢令兒輩知已  
鬱薦賢之懷聊謀承教之便高文嗣至厚意莫酬夫士  
取其賢而不計窮通然學裕乎中則見於辭采有能去  
彼而取此加以彪外而弼中若公議未墮必褰裳而爭

取如造物不予或按劍於暗投在今日而論才得夫君  
之畏友受八面之敵遊刃有餘看一錢之囊炊煙不起  
詩解頤而紙欲貴衿見肘而琴常鳴冥搜笑東野之寒  
處約有孟賁之勇誰遣兩窮之相值共嗟五技之何為  
請姑就廣文之羶儻其得飽容徐貸監河之粟會有知  
音跂以俟公幸毋鄙我

答高解元啓

疲神鉛槧自憐獨冷之官照眼珠璣忽拜不貲之惠情

隨辭至愧與感并道路風埃雖易動鄉關之思山川竒  
勝茲可發氣宇之豪有底悲愁尚形覩縷歸裝分橐定  
多諸侯之賜金坐客無羶請視廣文之官舍

答張尉啓

一面相親遂有為察之樂雙緘俯逮得無過分之慙退  
避以辭勤誠不懈回軒左顧有光獨冷之門闌銜袖見  
投獲拜向來之珠玉榮生望表感與愧并某官襟懷坦  
夷器質渾厚破杜陵之萬卷浩乎填胷雖魯國之多儒

誰非避舍已摘髭於科第旋策足於仕塗綠捧成名煩  
申令之一布赤圓舊習挹先聲而四奔佇奏異稱亟膺  
迅召道山延閣政爾須材貂蟬兜鍪不應異轍某依仁  
滋久聯事云初氣已蘇君子前滿酬心素禮非為我輩  
設終荷謙撓借餘論之過優溢衰顏之有覲語離作惡  
念折柳之可堪為思苦遲顧報桃之已後

答陳解元啓

名魁薦牘喜屬宗盟贄謁冷官凜觀名義委驪珠而燭

鄙覺冰屋之回春玩味以還兢慙未沫某人心期千古  
筆力萬鈞造詣折微得前輩淵源之正精深行遠小後  
生雕篆之工倉公倒囊皆已試之方養氏引弦無不中  
之的果錦標之再奪佇雲路之高飛文價不羣久擅孫  
丁之譽臚傳第一定聯黃衛之芳未貢賀緘遽貽妙製  
探懷而贈白璧深愧暗投赤手而博於菟若為効報

答定海交代啓

製錦効官幸相先後朶雲拜賜備寫恩勤和氣春風温

乎襲人玉案英瓊若為論報敬憑尺楮少叙寸誠某官  
仙木蟠根天潢分派深探向歆之經術師表諸儒發為  
賀白之辭華膾炙萬口蚤蜚聲於仕路即闊步於英躔  
割鷄益沸於絃歌解牛何有於肯綮御屏簡注高軼漢  
唐循吏之稱鼎足延登行掩峴石相業之盛庶窮塗之  
一老竊巨庇於萬間某書社鯁生淮鄉冷族甲乙科僅  
收於壯歲十五年坐困於選曹家食之日居多官簿之  
卑可笑時賢回眄信有酸鹹嗜好之殊班綴殿名遂叨

民社撫字之寄念設施掣肘縣尹之公患而疎魯師心  
淮人之常情不容已而為之初未見其可者逮好音之  
至止歛疑慮之釋然蓋政綱整振則繼之易功而賢者  
馨效則賴以發藥而况民方偃草熙熙有春登之臺吏  
不到門寂寂無夜吠之犬即此遵奉足容老衰諗及瓜  
之期似幾已早委投李之惠益認不遺敬當尅日以趨  
庶便朝天之計繼今提耳策敢謂於平平謹用服膺教  
仰承於一一



答定海學職啓

舟凌驚浪肯輕一舍之遙袖出長綫有過萬金之貺禮  
寧素望言悉過情縣令竊師師之名本非麤使鄉校乃  
善否所定當有良規愧擁篲之未遑顧揚颿之先辱永  
以為好積藏璀璨之文其自於今日冀鐫磨之誨

答定海豐直學啓

荷民社之任方愧才疎從庠序之英庶資誨益執鴈未  
脩於三揖剖魚忽拜於雙封盥手誦之慰人甚矣某人

士鄉偉器學舍竒材衣沾月桂之香即觀騰越書映市  
槐之綠姑少遲回繼此鄙夫簿書之間當分賢者文字  
之樂

寄張丞啓

湖上定交恍追昨夢海瀕聯事殊副此心滿同到罷之  
期未沫從遊之樂茲憑尺楮少叙寸誠某官士價萬金  
賢關一僞文章輩古揚黃鐘大呂之和術業逸羣兼龍  
泉椎成之用盍徑躋冊府之步尚肩為海山之遊才正

繫於時須職豈容於丞負徒勞靡憚未妨對鴈鷺之行  
見晚興嗟倚俟造駕鸞之序某詩書廢忘齒髮推顏寸  
祿東西分甘吏隱諸公薦拔誤綴朝班勉焉戴巫馬之  
星終慮傷尹何之錦豈期寮契迺得石交人謂斯何方  
自省濶疎之病吾知免矣將日聞規誨之言即遂參承  
敢茲傾倒

答王秀才啓

銅章在腰遽成俗吏繡段落手良愜初心第褻拂之過

優撫碩疎而甚愧辭所詳及理之固然盖育才先刈楚  
之圖而自古有積薪之歎振夫學政首岐涇渭之濁清  
揆以道心猶是雞蟲之得失丐少安此容徐計之

答李秀才啓

披雲之願滿副此心振綺之文猥承佳惠荷袞襃之甚  
寵揆擣散以非宜把玩之餘兢慙未沫

答任秀才啓

其人學富齒尊鄉邦歸重實浮報嗇士論稱寃緘盛製

以來臨即卑官而見懇既形訟牒復繫州符上所行下  
不遵行詎非悖戾此有說彼豈無說將起紛爭當少姑  
須試容調護若夫拜珠玉之賜敢不謹扃鐫之藏

答陳秀才啓

講惠莊之友義眷予不遺叙孔李之世家葩華有作炆  
爐熏而莊誦覺神觀之復還想雖海縣之多材咸遜辭  
壇之巨擘喜識度外之士為是超然之文而勇若犯敵  
場之嚴眇乎計學職之末如鄉里閒居之老固合尊崇

然府公試可之人不容擬議至四子之引去尚旬日之  
為期今焉雖欲徇人外此真自無說不意厲賢之地動  
為聚訟之區老夫閱世之多觸處猶吾為嘆若兄處利  
害之表自可旁觀委身當愛憎之鋒遂成辭費敢貢芸  
人之誠覬肩種學之心儻翰墨之策勲庶功名之拾芥  
書生少年之氣常任已以直前吾宗古人之風必聞言  
而樂取

答為壽諸公啓

投老無成感桑蓬之初載拜嘉甚寵駭珠璧之揚輝諷  
玩以還珍藏敢後念向來鼎彝之志慙負可量彼所謂  
椿槿之年短長孰計茲勤祝頌良辱知憐

又

數攝提孟陬之貞倏逢元命拜夜光明月之賜大慰窮  
塗凡再被於光華宜倍增於感戢聽化兒之見處暇計  
風花載家集以珍藏用傳孫子

又

肇楚客之庚寅徒紉蘭蕙數絳人之甲子莫振泥塗敢  
謂記存過形祝頌直斗牛箕之宿可見數竒聆樊過渠  
之音祇令聽眩

又

正孟陬而以降連蹇何稱讀蓼莪而增悲劬勞是念豈  
謂掛弧之日有貽振綺之文裛拂過優凌兢罔措連城  
增價粲珠玉之晶熒十襲珍藏為子孫之矜式

謝吳使君為壽啓



共承嘉問俯記始生貞孟陬而永懷小戊子之何取味  
蓼莪之佳什答報謂何誦子墨之溫言凌兢罔措夫何  
嘗省猥逮衰遲念功名四方之心老懷易感拜牲齊多  
品之賜席戶有光聊攄不腆之辭庸謝彌隆之施

答馮祕校啓

變生肘腋幸惡子之就擒契重金蘭屈高情而見諗葩  
華耀目鑄誨如丹某人士價媿照乘之珍義風凜刺鐘  
之刃赴友人之急怒髮指冠拾縣尹之遺長牋銜袖彼

狂小子肆毒齋生事有司存固君章愛而不手理無衡  
決况陽膚喜已得情雖投畀之有餘豈簡孚之容苟敢  
蹈失刑之悔仰孤疾惡之心

答定海胡解元啓

偕郡侯之計充賦漢庭刷邑令之羞賴君楚產仍迂高  
盖肯貺新篇細披四六之工奚翅倍蓰之益某人才猷  
一敵人品萬金儲為學以造微發諸文而行遠廣揚較  
藝駭妙斷之成風餘子汗顏歛罷軍而亂轍寧止主司

之得雋抑知里社之有人居近鷗池舊占羣仙之籍行  
升鴈塔高題千佛之名儻小兒遂攀附之私則此老拜  
稠重之賜

答葉秀才啓

揖宣州之客深信人賢聆正始之音追還古意駭玩珠  
璣之光采頓忘簿領之塵埃盥手以還捫心知幸某人  
器資直天下士辭語非今之儒奄鮑昭三百年爭傳新  
作奏曼倩三千牘蓋赴昌期胡尚擔虞卿之簦曾未前

宣室之席風煙嘯傲碣遊漲海之窮鄉膏馥賸殘分惠  
飲冰之老令雖曰尋幽而選勝不幾捨苑而集枯奪目  
耀芒過領南金之贈汗顏修報滿懷鄭璞之羞

答趙縣丞啓

蜚聲直上正切時須舒嘯東來未辭丞負鬱賢者大有  
為之志遂鄙夫願承教之心緘疊紙之瑰竒為暮塗之  
寵賁某官價優國鎮派自天潢玉潤淵淳儲間平之偉  
望錦心繡口占游夏之賢科雖簡念於楓宸聊疇庸於

花縣拔薤得鋤姦之意先彼羣儉追風信取道之遙忽  
茲一蹶小勒螭頭之步來為松下之哦豈造物者巧於  
乘陽回陽春於飛雪抑聖天子老其才氣斬竹帛於東  
隅姑委身鴈鷺之前佇拭目鷗鵬之化某代耕俗吏識  
字老農冒難事而為邦推舊聞而撫俗書陽城之考兩  
閱歲時賦柴桑之歸一勞魂夢事莫難於末勢慶孰大  
於得朋政有賴於師資分豈惟於寮契自今以始無小  
大而從公夫必不然謂老耄而捨我

與黃運使啓

出綸中禁揭表外臺星省雖虛朝靡惜賢之歎日畿借  
重人瞻抗節之華不寧辦集於輸將亟且開明於曖昧  
凡今賀幅詎尚虛文敢因竿牘之誠敬効涓塵之益某  
官譽傾羣雋代不數人地負海涵抱孟韓之正學日光  
玉潔燦賈馬之雄文寢歷任塗蔚隆朝望曲臺中祕再  
與承華軺駕左符一皆上最民庸國論無不優者弊源  
害本洞然究之遲唐殿之覆甌士方傾聽首漢京而抗

斧人益聳瞻小待興除即諧調燮夫古今之理施澤難  
乎逮下而賢哲之誠行道恐其後時俾天下無窮人吾  
公有以自任為聖朝除弊事清時何憚不為遽有冒聞  
誠幾晉躡伏念某材無所取志不自量幸脫迹於耕鋤  
繼坐曹於簿領荷銅墨之畀付歛二載餘為里閭而憤  
捐積滿胃次甚欲伸吭一鳴於當路不覺引紙連日而  
成編念敷政詎容不平而賦民乃有偏重下情壅塞蓋  
率常叫天莫聞時傑奮亨多不待報政而去王京尹之

剛明有立事可披肝朱制帥之舊故見存理無掣肘慨  
操觚之甫竟遽上印以他遷苟尚安愒日之心亦恐重  
後機之悔人方失所惟伊傳有納隍之慙世或抱痾非  
岐盧無肉骨之効今且旅賀燕而交進敢爾挈積蠹而  
畢陳細字疎行人講時流之苛禮救焚拯溺我知君子  
之本心揆造次以自疑念參差於既往俾磬磬數千戶  
均樂其生則耄耄六十翁畢無餘願瓜時而代尚為七  
月之留葵葉所傾正竊二天之覆



答李秀才啓

鴈鴛蓬行悵防閑之易失脊令背影影紛謀訴以互興起  
釁有由抱慙無已棣華暉映鄉里共推宰木在亡仁人  
深惻助公家者過雖近厚感先隴者情或難堪緣小史  
岐肝膽厚薄之殊致華宗有參商闢閱之間幸今二難  
之既翕肯為一夫而凶終不得平而則鳴原情有在小  
有言而終吉於義何傷中然謙虛忽此臨辱委驪珠之  
照夜無乃暗投顧窮谷之回春良多慶喜

答林判院謝和詩并惠啓

狂言卮出方此內慙妙製鼎來森然魄動向知九守之  
特勝倏復一鳴而驚人某官前輩典刑盛時才傑插架  
三萬軸囊括前修付子二百年氣吞我輩而能密韜鋒  
穎恬養胚渾眼白對躡嚙翁心期友無言子惟不戰而  
善屈是謂神兵至深藏而若虛決非市賈茹伯倫之一  
頌笑子貢之多言偶露一斑遽瘖萬馬論交已久居聞  
典魏舒之籌陳義甚高豈止見醜蔑之面逮茲呈拙悔

不慎辭使猶惜折楊之歌何以挹破竹之句僭題石鼎  
固宜招瓜芋之嘲謬薦豚蹄豈謂詫篝車之滿喜歸裝  
之甚富仰友義之巨忘投老山林敢使緘滕之闕追蹤  
步武永貽孫子之傳

答王祕校啓

湖南客好肯為邊郡之留冀北羣空歛話詞壇之別軒  
回小隱袖出長牋顧慙襄拂之過情驚見葩華之奪目  
某人探源學海挺秀儒林襞積古今蟠胸中之萬卷琢

雕造化紆筆底之九文前修直與之周旋我輩不難於  
陵駕唱集英之第猶是通家追正始之音恣容窺管顧  
乃不自為足借聽於聾在君子鳴謙心每虛而能受然  
小人揣已顙有泚而謂何囊錦南旋帆舟西笑江山如  
舊載新吟詠之工魚鴈可憑倚俟歸來之訊正切塵譚  
之發藥毋令詩社之寒盟

江湖長翁集卷三十七